

謝恩夫其所在唯聞音樂震動山川因仰面
視諸龍駕雲悉旋逸五色鮮明世之莫識須
更漸遠隱而不見矣

太上老君說消災經

卷四

六

太上太清天童護命妙經


三茅山道者梁悟真受

太上曰皇天生我皇地載我日月照我星辰
榮我諸仙舉我司令與我大一任我玉宸君
我三官保我五帝衛我北辰相我南極佑我
北斗輔我金童侍我玉女從我六甲直我六
丁進我天門開我地戶通我山澤容我江河
渡我風雨送我雷電隨我八卦尊我九宮遁
我陰陽宗我五行符我四時成我我命著我
太清玄籍三官升降上下往來无窮无息金
飯玉漿向求皆至虛梵日月與天為誓魁魁
魁魁魁魁星所求皆得所向者亨所為者
合所欲者成種種變化與道合真何神不使
何令不行我前有朱雀後有玄武左有青龍
右有白虎上有華蓋下躡魁罡神道光嚴威
鎮十方愛我者生惡我者殃謀我者死憎我
者亡靈童神女破邪金剛三千六百常在我
傍執節捧符與我同遊太上攝京天大吉昌
二十四符與星曆俱急急如律令

太上驅邪治病靈符

卷四

*



太上太清天童護命靈文乃

全關上真授付修道之士及世間男女若
能每日清朝念此經三遍至七遍乃至百
遍即有十方靈寶元上仙眾三元將軍翊
天四帥真君飛天神王破邪力士統領神
將吏兵各千萬億守衛誦經者常令安穩
金精猛獸無鞅外護百鬼不能侵邪魔不

敢害可以破廟除邪可以治病消災旦夕持誦令人耳目聰明身強體輕延年益壽永保長生策書纂此靈符二十四道佩帶則驅邪吞服則治病常以甲子庚申朱書唯在志誠佩而行之

太上太清天童護命妙經

隋大業十三年老君遣霍山神預告唐公受命之符至高祖武德元年二月二十三日有老人鬚髮皓白素衣烏冠乘白馬驥尾及蹄皆赤現晉州羊角山謂絳人吉善行曰與我語大唐天子今得聖治社稷延洪言訖騰空而去其年四月二十七日復現如前但未審將何為信老人曰汝到京有獻石龜者可為驗言訖不見善行以五月五日見晉州總管賀孝義具言其事孝義將善行見秦王王討賊駐節於晉遂差都督杜昂與善行於所現處致祭老人復現如善行所言秦王令昂與善行馳驛入奏五月十九日到京於朝堂門見印州治中張達進石龜上有文曰天下安子孫興

千萬葉千萬歲乃同入奏果符前驗高祖大悅勅於現處立廟善行復見老人曰天子疑我何事答曰為不知聖者姓名老人曰我是无上神仙號曰老君即帝之聖祖也亳州有枯檜再生以驗天下太平善行

即告孝義奏聞又於其年十二月七日老君於廟復現為善行曰我亳州廟中枯檜已更生唐得聖治子孫當享國綿永已遣神兵百萬待四月節助國討劉黑闥即馳入奏至次年四月二十一日果平黑闥於是天下大定而枯檜果更生焉改羊角山為龍角山以廟為慶唐觀至高祖龍朔間老君復現依狀圖寫號為瑞像今本觀正係天下第一地肺福地高辛時展上公得道昇仙晉有許長史披尋其地建宅修真父子得道俱已仙去丹井存焉梁有陶隱居追尋其跡而建昭真臺纂集三洞四輔靈文唐開元間李玄靜先生為玄宗度師請于朝賜以金帛即昭真臺基而立瑞像殿逮今幾五百年而殿宇瑞像皆唐人所

造為古道場甲於茅山也本朝大觀三年四月十三日有執爨道者梁悟真凌晨汲水於殿前養龍池俄有紫雲彌覆其所須臾見一羽衣庵眉皓首長髯如雪乘白馬自空而下梁驚視其狀與殿中粹容無異

梁急作禮伏地太上曰吾居太清境上偶降靈壇憐汝服役勤勞有志於道而一無所遇今投汝加句天童護命妙經當專心誦之立功行於世道將為汝得矣梁拜受慈訓仰觀聖真復乘馬嘶鳴凌虛而去是歲其地產芝草一本數莖梁自此却粒神觀頓異平時庸愚未嘗識字至是能書誦經靡不通曉示人災福歷歷如神而梁仙去前三日書二十四符投池中凡有疾之人入山求水服而愈者不可勝數奉道之士晨夕崇奉凡有所求虔心祈禱無不感應嘗讀混元聖紀故錄示像之因并顯應之跡以告來者紹興甲子茅山都道正明真通微大師傳書謹書